

四庫全書

集部

欽定四庫全書

集部
唐詩鏡卷十八

詳校官庶吉士臣范逢恩

主事銜臣徐以坤覆勘

總校官編修臣王燕緒

校對官編修臣張燾

謄錄監生臣毛敬事

欽定四庫全書

唐詩鏡卷十八

明 陸時雍 編

盛唐第十

李白

二

七言樂府

遠別離

遠別離古有皇英之二女乃在洞庭之南瀟湘之浦海

水直下萬里深誰人不言此離苦日慘慘兮雲冥冥
猩啼煙兮鬼嘯雨我縱言之將何補皇穹竊恐不照余
之忠誠雷馮馮兮欲吼怒堯舜當之亦禪禹君失臣兮
龍為魚權歸臣兮鼠變虎或言堯幽囚舜野死九疑聯
緜皆相似重腫孤墳竟誰是帝子泣兮綠雲間隨風波
兮去無還慟哭兮遠望見蒼梧之深山蒼山崩湘水
絕竹上之淚乃可滅

此詩殆為上皇或言堯幽囚舜野死九疑聯綿皆
相似重腫孤墳竟誰是此蓋憤詞廟上皇不得正

其終也語
致錯落之奇

蜀道難

蕭士贇注曰太白深知玄宗
幸蜀之非故作是詩以達意

噫吁嚱危乎高哉蜀道之難難於上青天蠶叢及魚鳧
開國何茫然爾來四萬八千歲不與秦塞通人煙西當
太白有鳥道可以橫絕峨眉巔地崩山摧壯士死然後
天梯石棧相鈎連上有六龍回日之高標下有衝波逆
折之迴川黃鶴之飛尚不得過猿猱欲度愁攀緣青泥

何盤盤百步九折縈巖巒捫參歷井仰脅息以手撫膺
坐長歎問君西遊何時還畏途巉巖不可攀但見悲鳥
號古木雄飛雌從繞林間又聞子規啼夜月愁空山蜀
道之難難於上青天使人聽此凋朱顏連峯去天不盈
尺枯松倒挂倚絕壁飛湍瀑流爭喧豗砢砢披冰切崖轉石
萬壑雷其險也若此嗟爾遠道之人胡為乎來哉劔閣
崢嶸而崔巍一夫當關萬夫莫開所守或匪親化為狼
與豺朝避猛虎夕避長蛇磨牙吮祖克切血殺人如麻錦

城雖云樂不如早還家蜀道之難難於上青天側身西
望長咨嗟

蜀道難近賦體魁
梧奇謫知是偉人

公無渡河

黃河西來決崑崙咆哮萬里觸龍門波滔天堯咨嗟大
禹理百川兒啼不窺家殺湍湮洪水九州始桑麻其害
乃去茫然風沙被髮之叟狂而癡清晨臨流欲奚為旁
人不惜妻止之公無渡河苦渡之虎可搏河難馮公果

溺死流海湄海湄有長鯨白齒若雪山公乎公乎掛骨
於其間篋篋所悲竟不還

茫然風沙一段最是奇蕩旁人不惜妻止之
公無渡河苦渡之二語悲甚可作當年之曲

烏夜啼

黃雲城邊烏欲棲歸飛啞啞枝上啼機中織錦秦川女
碧紗如煙隔窻語語停梭悵然憶遠人獨宿孤房淚如雨

此詩視本詞似從旁題詠得其大意太白作古樂府每自出行軸

烏棲曲

姑蘇臺上烏棲時
吳王宮裏醉西施
吳歌楚舞歡未畢
青山欲銜半邊日
銀箭金壺漏水多
起看秋月墜江波
東方漸高奈樂何

從容
高雅

荊州歌

白帝城邊足風波
瞿塘五月誰敢過
荊州麥熟繭成蛾
綠絲憶君頭緒多
撥穀飛鳴奈妾何

妙切情事得
之子夜居多

戰城南

去年戰桑乾源今年戰葱河道洗兵條支海上波放馬
天山雪中草萬里長征戰三軍盡衰老匈奴以殺戮為
耕作古來唯見白骨黃沙田秦家築城備胡處漢家還
有烽火然烽火然不息長征無已時野戰格鬪死敗馬
嘶鳴向天悲烏鳶啄人腸銜飛上挂枯樹枝士卒塗草
莽將軍空爾為乃知兵者是凶器聖人不得已而用之

老保 七言樂府意象作用得自西漢樂府居多
淋漓痛快往往追神入妙 烏鳶啄人腸銜飛上

挂枯樹枝於頭，顧成塚膏血。
成川中略一二語指點得出。

行行且遊獵篇

邊城兒生年不讀一字書，但將遊獵誇輕趨。胡馬秋肥
宜白草，騎來躡影何矜驕。金鞭拂雪揮鳴鞘，半酣呼鷹
出遠郊。弓彎滿月不虛發，雙鶴迸落連飛鶻。音海邊觀
者皆辟易，猛氣英風振沙磧。儒生不及遊俠人，白首下

惟復何益

輕快絕
不粘手

飛龍引二首

黃帝鑄鼎於荆山鍊丹砂丹砂成黃金騎龍飛上太清
家雲愁海思令人嗟宮中綵女顏如花飄然揮手凌紫
霞從風縱體登鸞車登鸞車侍軒轅遨遊青天中其樂
不可言

鼎湖流水清且閒軒轅去時有弓劍古人傳道留其間
後宮嬋娟多花顏乘鸞飛煙亦不還騎龍攀天造天關
造天關聞天語長雲河車載玉女載玉女過紫皇紫皇

乃賜白兔所搗之藥方後天而老周三光下視瑤池見
王母蛾眉蕭颯如秋霜

高簡 古貌

如秦儀漢制

天馬歌

天馬來出月氏窟背為虎文龍翼骨嘶青雲振綠髮蘭
筋權竒走滅沒騰崑崙歷西極四足無一蹶雞鳴刷燕
哺秣越神行電邁躡恍惚天馬呼飛龍趨目鳴長庚臆
雙鳧尾如流星首渴烏口噴紅光汗溝珠曾陪時龍躍

天衢羈金絡月照皇都逸氣稜稜凌九區白壁如山誰
敢沽回頭笑紫燕但覺爾輩愚天馬奔戀君軒駮音躍

驚矯浮雲翻萬里足躑躅遙瞻閭闔門不逢寒風子誰
采逸景孫白雲在青天丘陵遠崔嵬鹽車上峻坂倒行
逆施畏日晚伯樂剪拂中道遺少盡其力老棄之願逢
田子方惻然為我悲雖有玉山禾不能療苦饑嚴霜五
月凋桂枝伏櫪銜冤推兩眉請君贖獻穆天子猶堪弄

影舞瑤池

語多神駿 取意結撰絕去
凡近乃知體氣高貴自別

行路難三首

金樽清酒斗十千 玉盤珍羞直萬錢
停杯投筯不能食 拔劍四顧心茫然
欲渡黃河水塞川 將登太行雪暗天
閒來垂釣坐谿上 忽復乘舟夢日邊
行路難 行路難 多岐路 今安在
長風破浪會有時 直挂雲帆濟滄海

大道如青天 我獨不得出
羞逐長安社中兒 赤雞白狗賭梨栗
彈劍作歌奏苦聲 曳裾王門不稱情
淮陰市井

笑韓信漢朝公卿忌賈生君不見昔時燕家重郭隗擁
篲折節無嫌猜劇辛樂毅感恩分輸肝剖膽劾英才昭
王白骨縈蔓草誰人更掃黃金臺行路難歸去來

有耳莫洗潁川水有口莫食首陽蕨含光混世貴無名
何用孤高比雲月吾觀自古賢達人功成不退皆殞身
子胥既棄吳江上屈原終投湘水濱陸機俊才豈自保
季斯稅駕苦不早華亭唳鶴詎可聞上蔡蒼鷹何足道
君不見吳中張翰稱達生秋風忽憶江東行且樂生前

一杯酒何須身後千載名

長相思

長相思在長安
絡緯秋啼金井闌
微霜淒淒簾色寒
孤燈不明思欲絕
卷帷望月空長歎
美人如花隔雲端
上有青冥之高天
下有淥水之波瀾
天長路遠魂飛苦
夢魂不到闕山難
長相思摧心肝

意氣咆勃

才大使然

日色已盡花含煙
月明欲素愁不眠
趙瑟初停鳳凰柱

蜀琴欲奏鴛鴦絃此曲有意無人傳願隨春風寄燕然
憶君迢迢隔青天昔時橫波目今為流淚泉不信妾腸
斷歸來看取明鏡前

上留田行

行至上留田孤墳何崢嶸積此萬古恨春草不復生悲
風四邊來腸斷白楊聲借問誰家地埋沒蒿里塋古老
向余言言是上留田蓬科馬鬣今已平昔之弟死兄不
葬他人於此舉銘旌一鳥死百鳥鳴一獸走百獸驚桓

山之禽別離苦欲去迴翔不能征田氏倉卒骨肉分青
天白日摧紫荆交柯之木本同形東枝頽頽西枝榮無
心之物尚如此參商胡乃尋天兵孤竹延陵讓國揚名
高風緬邈頽波激清尺布之謠塞耳不能聽

淋漓
耐暢

春日行

深宮高樓入紫清金作蛟龍盤繡楹佳人當牕弄白日
絃將手語彈鳴箏春風吹落君王耳此曲乃是昇天行

因出天池汎蓬瀛樓船感沓波浪驚三千雙蛾獻歌笑
搗鐘考鼓宮殿傾萬姓聚舞歌太平我無為人自寧三
十六帝欲相迎仙人飄翻下雲輶帝不去留鑄京安能
為軒轅獨往入宵冥小臣拜獻南山壽陸下萬古垂鴻
名

酬

前有一樽酒行二首

春風東來忽相過金樽綠酒生微波落花紛紛稍覺多

美人欲醉朱顏酡青軒桃李能幾何流光欺人忽蹉跎
君起舞日西夕當年意氣不肯平白髮如絲竟何益
琴奏龍門之綠桐玉壺美酒清若空催絃拂柱與君飲
看朱成碧顏始紅胡姬貌如花當壚笑春風笑春風舞
羅衣君今不醉將安歸

崎嶇

跌宕

夜坐吟

冬夜夜寒覺夜長沈吟久坐坐北堂冰合井泉月入閨

金缸青凝照悲啼
金缸滅啼轉多掩
妾淚聽君歌
歌有聲妾有情
情聲合兩無違
一語不入意
從君萬曲梁塵飛

野田黃雀行

遊莫逐炎洲翠
棲莫近吳宮燕
吳宮火起焚巢窠
炎洲逐翠遭網羅
蕭條兩翅蓬蒿下
縱有鷹鷂奈爾何

箜篌謠

攀天莫登龍
走山莫騎虎
貴賤結交心
不移唯有嚴陵

及光武周公稱大聖管蔡寧相容漢誼一斗粟不與淮
南春兄弟尚路人吾心安所從他人方寸間山海幾千
重輕言託朋友對面九疑峯多花必早落桃李不如松
管鮑久已死何人繼其蹤

雉朝飛操

麥隴青青三月時白雉朝飛挾兩雌錦衣綺翼何離襍
山宜切犢牧采薪感之悲春天和白日煖啄食飲泉勇氣
滿爭雄鬪死繡頸斷雉子斑奏急管絃傾心酒美盡王

碗枯楊枯楊爾生莢我獨七十而孤棲彈絃寫恨意不
盡瞑目歸黃泥

彈琴寓意寄恨無窮

宛是妝牘子語

上雲樂

金天之西白日所沒康老胡雛生彼月窟巉巖容儀戍
削風骨碧玉炁炁雙目瞳黃金拳拳兩鬢紅華蓋垂下
睫嵩嶽臨上唇不覩詭譎貌豈知造化神大道是文康
之嚴父元氣乃文康之老親撫頂弄盤古推車轉天輪

云見日月初生時鑄冶火精與水銀陽烏未出谷顧兔
半藏身女媧戲黃土團作愚下人散在六合間濛濛若
沙塵生死了不盡誰明此胡是仙真西海栽若木東溟
植扶桑別來幾多時枝葉萬里長中國有七聖半路頽
洪荒陛下應運起龍飛入咸陽赤眉立盆子白水興漢
光叱咤四海動洪濤為簸揚舉足躡紫微天關自開張
老胡感至德東來進仙倡五色師子九苞鳳凰是老胡
雞犬鳴舞飛帝鄉淋漓颯沓進退成行能胡歌獻漢酒

跪雙膝立兩肘散花指天舉素手拜龍顏獻聖壽北斗
庚南山推天子九九八十一萬歲長傾萬歲杯

勃率
淋漓

夷則格上白鳩拂舞辭

鏗鳴鐘考朗鼓歌白鳩引拂舞白鳩之白誰與鄰霜衣
雪襟誠可珍含哺七子能平均食不噎性安馴首農政
鳴陽春天子刻玉杖鏤形賜耆人白鷺亦白非純真外
潔其色心匪仁闕五德無司農胡為啄我葭下之紫鱗

鷹鷂鷓鴣貪而好殺鳳凰雖大聖不願以為臣

古而
雅

玉壺吟

烈士擊玉壺壯心惜暮年三杯拂劍舞秋月忽然高詠涕
泗連鳳凰初下紫泥詔謂帝稱觴登御筵揄揚九重萬乘
主謔浪赤墀青瑣賢朝天數換飛龍馬救賜珊瑚白玉鞭
世人不識東方朔大隱金門是謫仙西施宜笑復宜醜
女效之徒累身君王雖愛蛾眉好無奈宮中妬殺人

步驟之奇

歌頌之妙

日出入行

日出東方隈似從地底來
歷天又入海六龍所舍安在
哉其始與終古不息人非元氣
安得與之久徘徊草不
謝榮於春風木不怨落於秋天
誰揮鞭策驅四運萬物
興歇皆自然義和義和汝奚汨
沒於荒淫之波魯陽何
德駐景揮戈逆道違天矯誣
實多吾將囊括大塊浩然
與溟滓同科

北風行

燭龍棲寒門光曜猶旦開日月照之何不及此唯有北
風號怒天上來燕山雪花大如席片片吹落軒轅臺幽
州思婦十二月停歌罷笑雙蛾推倚門望行人念君長
城苦寒良可哀別時提劍救邊去遺此虎紋金鞞鞞中
有一雙白羽箭蜘蛛結網生塵埃箭空在人今戰死不
復迴不忍見此物焚之已成灰黃河捧土尚可塞北風
雨雪恨難裁

漢 氣

獨澆篇

獨澆水中泥水濁不見月不見月尚可水深行人沒越
鳥從南來胡鴈亦北度我欲彎弓向天射惜其中道失
歸路落葉別樹飄零隨風客無所託悲與此同羅幃舒
卷似有人開明月直入無心可猜雄劍挂壁時時龍鳴
不斷犀象繡澀苔生國恥未雪何由成名神鷹夢澤不
顧鳩鳶為君一擊搏鵬九天

仿徨驚顧妙得其
神古詞何必勝此

登高丘而望遠海

登高丘望遠海六螯骨已霜三山流安在扶桑半摧折
白日沈光影銀臺金闕如夢中秦皇漢武空相待精衛
費木石龜鼉無所憑君不見驪山茂陵盡灰滅牧羊之
子來攀登盜賊劫寶玉精靈竟何能窮兵黷武今如此
鼎湖飛龍安可乘

陽春歌

長安白日照春空
綠楊結煙垂
裊風披香殿
前花始紅
流芳發色繡戶中
繡戶中相經過
飛燕皇后輕身舞
紫宮夫人絕世歌
聖君三萬六千日
歲歲年年奈樂何

楊叛兒

君歌楊叛兒
妾勸新豐酒
何許最關人
烏啼白門柳
烏啼隱楊花
君醉留妾家
博山鑪中沈香火
雙煙一氣凌
紫霞

楊叛兒本詞
既襲此調
轉入高華

雙燕離

雙燕復雙燕雙飛令人羨
玉樓珠閣不獨棲金牕繡戶
長相見柏梁失火去因入吳王宮
吳宮又焚蕩離盡巢
亦空憔悴一身在孀雌
憶故雄雙飛難再得傷我寸心
中

山人勸酒

蒼蒼雲松落落綺皓春風爾來為阿誰
蝴蝶忽然而滿芳
草秀眉霜雪顏桃花青髓綠髮長美好稱是秦時避世

人勸酒相歡不知老各守麋鹿志恥隨龍虎爭歎起佐
太子漢皇乃復驚顧謂戚夫人彼翁羽翼成歸來高山
下泛若雲無情舉觴酌巢由洗耳何獨清浩歌望嵩嶽
意氣遙相傾

語致間仍見
高風落落

于闐采花

于闐采花人自言花相似明妃一朝西入胡胡中美女
多羞死乃知漢地多名姝胡中無花可方比丹青能令

醜者妍無鹽翻在深宮裏自古妬蛾眉胡沙埋皓齒

清辨絕倫後二
語感慨欲絕

鞠歌行

玉不自言如桃李魚目笑之卞和恥楚國青蠅何太多
連城白壁遭讒毀荆山長號泣血人忠臣死為刖足鬼
聽曲知竄戚夷吾因小妻秦穆五羊皮買死百里奚洗
拂青雲上當時賤如泥朝歌鼓刀叟虎變磻谿中一舉
釣六合遂荒營丘東平生渭水曲誰識此老翁奈何今

之人雙目送飛鴻

幽澗泉

拂彼白石彈五素琴幽澗愀兮流泉深善手明徽高張
清心寂歷似千古松颺颺兮萬尋中見愁猿弔影而危
處兮叫秋木而長吟客有哀時失志而聽者淚淋浪以
霑襟乃緝商綴羽潺湲成音吾但寫聲發憤於妙指殊
不知此曲之古今幽澗泉鳴深林

冷然清韻

恰與調合

王昭君

漢家秦地月流影
照明妃一上玉關道
天涯去不歸漢
月還從東海出
明妃西嫁無來日
燕支長寒雪作花
蛾眉憔悴沒胡沙
生乏黃金枉圖畫
死留青塚使人嗟

設辟邪伎鼓吹雉子斑曲辭

辟邪伎作鼓吹
驚雉子斑之奏曲
成喔咿振迅欲飛鳴
扇錦翼雄風生
雙雌同飲啄
趨丘妖切悍誰能爭乍向草

中耿介死不
求黃金籠下生
天地至廣大
何惜遂物情

善卷讓天子務光亦逃名所貴曠士懷朗然合太清

梁父吟

長嘯梁父吟何時見陽春君不見朝歌屠叟辭棘津八
十西來釣渭濱寧羞白髮照綠水逢時吐氣思經綸廣
張三千六百鈞風期暗與文王親大賢虎變愚不測當
年頗似尋常人君不見高陽酒徒起草中長揖山東隆
準公入門不拜騁雄辯兩女輟洗來趨風東下齊城七
十二指揮楚漢如旋蓬狂客落魄尚如此何況壯士當

羣雄我欲攀龍見明主雷公砰訇音烹震天鼓帝傍投

壺多玉女三時大笑開電光倏爍晦冥起風雨閭闔九

門不可通以額扣闕閣者怒白日不照吾精誠把國無

事憂天傾楔猢音乙磨牙競人肉騶虞不折生草莖手

接飛猿搏彫虎側足焦原未言若智者可卷愚者豪世

人見我輕鴻毛力排南山三壯士齊相殺之費二桃吳

楚弄兵無劇孟亞夫呼來切爾為徒勞梁父吟聲正悲

張公兩龍劒神物各有時風雲感會起屠釣大人峴岵

音鼻
兀 當安之

氣魄馳驟如風雨
憑陵驚起四坐

將進酒

君不見黃河之水天上來奔流到海不復回君不見高
堂明鏡悲白髮朝如青絲暮如雪人生得意須盡歡莫
使金樽空對月天生我材必有用黃金散盡還復來烹
羊宰牛且為樂會須一飲三百杯岑夫子丹丘生進酒
君莫停與君歌一曲請君為我傾耳聽鐘鼓饌玉不足

貴但願長醉不復醒古來賢聖皆寂寞惟有飲者留其名
陳王昔時宴平樂斗酒十千恣譴詭主人何為言少
錢徑須沽取對君酌五花馬千金裘呼兒將出換美酒
與爾同銷萬古愁

豪 一起撇揭 天生我材必有用黃金散盡還
復來仰天大笑出門去我輩豈是蓬蒿人淺淺語
使後人傳道無已
以其中有靈氣

久別離

別來幾春未還家玉牕五見櫻桃花况有錦字書開緘

使人嗟至此腸斷彼心絕雲鬟霧鬢罷梳結愁如迴颺
亂白雪去年寄書報陽臺今年寄書重相催東風兮東
風為我吹行雲使西來待來竟不來落花寂寂委青苔

幽思飄然絕
去綺羅色相

白頭吟

錦水東北流波蕩雙鴛鴦雄巢漢宮樹雌弄秦草芳寧
同萬死碎綺翼不忍雲間兩分張此時阿嬌正嬌妬獨
坐長門愁日暮但願君恩顧妾深豈惜黃金買詞賦相

如作賦得黃金丈夫好新多異心一朝將聘茂陵女文
君因贈白頭吟東流不作西歸水落花辭條羞故林兔
絲本無情隨風任傾倒誰使女蘿枝而來強縈抱兩草
猶一心人心不如草莫捲龍鬚席從他生網絲且留瓊
珀枕或有夢來時覆水再收豈滿杯棄妾已去難重回
古來得意不相負祇今唯見青陵臺

臨江王節士歌

洞庭白波木葉稀燕鴻始入吳雲飛吳雲寒燕鴻苦風

號沙宿瀟湘浦節士感秋淚如雨白日當天心照之可
以事明主壯氣憤寒風生安得倚天劍跨海斬長鯨

司馬將軍歌

狂風吹古月竊弄章華臺北落明星動光彩南征猛將
如雲雷手中電曳倚天劍直斬長鯨海水開我見樓船
壯心目頗似龍驤下三蜀揚兵習戰張虎旗江中白浪
如銀屋身居玉帳臨河魁紫髯若戟冠崔嵬細柳開營
揖天子始知灞上為嬰孩羌笛橫吹阿鞞迴

蕃曲名

向月

樓中吹落梅將軍自起舞長劍壯士呼聲動九垓功成
獻凱見明主丹青畫像麒麟臺

白紵辭三首

揚清歌發皓齒北方佳人東鄰子且吟白紵停綠水長
袖拂面為君起寒雲夜捲霜海空胡風吹天飄塞鴻玉
顏滿堂樂未終館娃日落歌吹濛

月寒天清夜沈沈美人一笑千黃金垂羅舞榭揚哀音
郢中白雪且莫吟子夜吳歌動君心動君心冀君賞願

金定四庫全書
卷十八
作天池雙鴛鴦一朝飛去青雲上

吳刀剪綵縫舞衣明妝麗服奪春暉揚眉轉袖若雪飛
傾城獨立世所稀激楚結風醉忘歸高堂月落燭已微
玉釵挂纓君莫違

鮑俊而麗
此俊而爽

鳴鴈行

胡鴈鳴辭燕山昨發委羽朝度關一一銜蘆枝南飛散
落天地間連行接翼往復還客居煙波寄相吳凌霜觸

雪毛體枯畏逢矰繳驚相呼聞弦虛墜良可吁君更彈
射何為乎

君馬黃

君馬黃我馬白馬色雖不同人心本無隔共作遊冶盤
雙行洛陽陌長劍既照耀高冠何赭

遠力切

赫各有千金

裘俱為五侯客猛虎落陷穿壯士時屈厄相知在急難
獨好亦何益

采蓮曲

若耶谿傍采蓮女笑隔荷花共人語日照新妝水底明
風飄香袖空中舉岸上誰家遊冶郎三三五五映垂楊
紫騮嘶入落花去見此踟躕空斷腸

語致閒閒生情布景 余嘗論大家法門能閒而
整能寬而密能淡而旨能簡而奧能無心而舉會
能不言而自至能詳而不煩能嚴
而不迫是故華而不靡質而不俚

擣衣篇

閨裏佳人年十餘
嘯蛾對影恨離居
忽逢江上春歸燕
銜得雲中尺素書
玉手開緘長歎息
狂夫猶戍交河北

萬里交河水北流願為雙燕泛中洲君邊雲擁青絲騎
妾處苔生紅粉樓樓上春風日將歇誰能覽鏡看愁髮
曉吹員管隨落花夜擣戎衣向明月明月高高刻漏長
真珠簾箔掩蘭堂橫垂寶幄同心結半拂瓊筵蘇合香
瓊筵寶幄連枝錦燈燭熒熒照孤寢有便憑將金剪刀
為君留下相思枕摘盡庭蘭不見君紅巾拭淚坐氲氲
明年若更征邊塞願作陽臺一段雲

氣韻
流美

江上吟

木蘭之枻沙棠舟，玉簫金管坐兩頭。
美酒樽中置千斛，載妓隨波任去流。
仙人有待乘黃鶴，海客無心隨白鷗。
屈平詞賦懸日月，楚王臺榭空山丘。
興酣落筆搖五嶽，詩成嘯傲凌滄洲。
功名富貴若長在，漢水亦應西北流。

一起四語寫作特佳，突然而起矯然而止，人知其句語之美，不知其體制之佳。

梁園吟

我浮黃河去京闕，挂席欲進波連山。
天長水濶厭遠涉。

訪古始及平臺間平臺為客憂思多對酒遂作梁園歌
却憶蓬池阮公詠因吟淶水揚洪波洪波浩蕩迷舊園
路遠西歸安可得人生達命豈暇愁且飲美酒登高樓
平頭奴子搥大扇五月不熱如清秋玉盤楊梅為君設
吳鹽如花皎白雪持鹽把酒但飲之莫學夷齊事高潔
昔人豪貴信陵君今人耕種信陵墳荒城遠照碧山月
古木盡入蒼梧雲梁王宮闕今安在枚馬先歸不相待
舞影歌聲散綠池空餘汴水東流海沈吟此事淚滿衣

黃金買醉未能歸
連呼五白行六博
分曹賭酒酣馳輝
歌且謠意方遠
東山高卧時起來
欲濟蒼生未應晚

不衫不履
體氣自貴

懷仙歌

一鶴東飛過滄海
放心散漫知何在
仙人浩歌望我來
應攀玉樹長相待
堯舜之事不足驚
自餘噉噉直可輕
巨鼇莫載三山去
吾欲蓬萊頂上行

雄

氣岸

襄陽歌

落日欲沒峴山西倒著接羅花下迷襄陽小兒齊拍手
攔街爭唱白銅鞮傍人借問笑何事笑殺山翁醉似泥
鷓鴣杓鸚鵡杯百年三萬六千日一日須傾三百杯遙
看漢水鴨頭綠恰似蒲萄初醱醅此江若變作春酒壘
麴便築糟丘臺千金駿馬換少妾醉坐雕鞍歌落梅車
傍側挂一壺酒鳳笙龍管行相催咸陽市上歎黃犬何
如月下傾金罍君不見晉朝羊公一片石龜龍剝落生

莓苔淚亦不能為之墮心亦不能為之衰清風明月不
用一錢買玉山自倒非人推舒州杓力士鎗李白與爾
同死生襄王雲雨今安在江水東流猿夜聲

一往之士不寄人羅下况乎
豪傑此中披豁所未驟見

臨路歌

大鵬飛兮振八裔中天推兮力不濟餘風激兮萬世遊
扶桑兮挂石袂後人得之傳此仲尼亡兮誰為出涕

古意

唐詩鏡卷十八

欽定四庫全書

唐詩鏡卷十九

明 陸時雍 編

盛唐第十一

李白 三

七言古詩

侍從宜春苑奉詔賦龍池柳色初青聽新鶯百

轉歌

東風已綠瀛洲草紫殿紅樓覺春好池南柳色半青青
縈煙裊娜拂綺城垂絲百尺挂雕楹上有好鳥相和鳴
間關早得春風情春風卷入碧雲去千門萬戶皆春聲
是時君王在鎬京五雲垂暉耀紫清仗出金宮隨日轉
天迴玉輦繞花行始向蓬萊看舞鶴還過陸石聽新鶯
新鶯飛繞上林苑願入簫韶雜鳳笙

秀
美

元丹丘歌

元丹丘好神仙朝飲潁川之清流暮還嵩岑之紫煙三
十六峰長周旋長周旋躡星虹身騎飛龍耳生風橫河
跨海與天通我知爾遊心無窮

扶風豪士歌

洛陽三月飛胡沙洛陽城中人怨嗟天津流水波赤血
白骨相撐如亂麻我亦東奔向吳國浮雲四塞道路賒
東方日出啼早鷄城門人開掃落花梧桐楊柳拂金井
來醉扶風豪士家扶風豪士天下奇意氣相傾山可移

作人不倚將軍勢飲酒豈顧尚書期
雕盤綺食會衆客
吳歌趙舞香風吹原嘗春陵六國時
開心寫意君所知
堂中各有三千士明日報恩知是誰
撫長劍一揚眉清
水白石何離離脫吾帽向君笑飲君酒
為君吟張良未
逐赤松去橋邊黃石知我心

白毫子歌

淮南小山白毫子乃在淮南小山裏
夜卧松下雲朝餐
石中髓小山聯絲向江開碧峰巉巖綠
水迴余配白毫

子獨酌流霞杯
拂花弄琴坐青苔
綠蘿樹下春風來
南牕蕭颯松聲起
憑崖一聽清心耳
可得見不得親
八公攜手五雲去
空餘桂樹愁殺人

幽歌行上新平長史兄粲

幽谷稍稍振庭柯
涇水浩浩揚湍波
哀鴻酸嘶暮聲急
愁雲蒼慘寒氣多
憶昨去家此為客
荷花初紅柳條碧
中宵出飲三百杯
明朝歸揖二千石
寧知流寓變光輝
胡霜蕭颯繞客衣
寒灰寂寞憑誰煖
落葉飄揚何處歸

吾兄行樂窮曠旭滿堂有美顏如玉趙女長歌入彩雲
燕姬醉舞嬌紅燭狐裘獸炭酌流霞壯士悲吟寧見嗟
前榮後枯相翻覆何惜餘光及棣華

駕去溫泉宮後贈楊山人

少年落魄楚漢間風塵蕭瑟多苦顏自言管葛竟誰許
長吁莫錯還閉關一朝君王垂拂拭剖心輸丹雪曾臆
忽蒙白日回景光直上青雲生羽翼幸陪鸞輦出鴻都
身騎飛龍天馬駒王公大人借顏色金璋紫綬來相趨

當時結交何紛紛
片言道合惟有君
待吾盡節報明主
然後相攜卧白雲

七言古酬贈題詠仍是唐音乃其雄情逸調縱自天成平平語俱度越一世高達夫時多爽句然幅淺意促苦於易窘杜子美氣勢雄沉而語多滯色以稱敵手未也

走筆贈獨孤駙馬

都尉朝天躍馬歸
香風吹人花亂飛
銀鞍紫鞵照雲日
左顧右眄生光輝
是時僕在金門裏
待詔公車謁天子
長揖蒙垂國士恩
壯心剖出酬知己
一別蹉跎朝市間

青雲之交不可攀，儻其公子重回顧，何必侯嬴長抱關。
醉後贈從甥高鎮

馬上相逢揖馬鞭，客中相見客中憐。欲邀擊筑悲歌飲，
正值傾家無酒錢。江東風光不借人，枉殺落花空自春。
黃金逐手快意盡，昨日破產今朝貧。丈夫何事空嘯傲，
不如燒却頭上巾。君為進士不得進，我被秋霜生旅鬢。
時清不及英豪人，三尺童兒重廉藺。匣中盤劍裝鰈魚，
閑在腰間未用渠。且將換酒與君醉，醉歸託宿吳專諸。

江上贈竇長史

漢求季布魯朱家楚逐伍胥去章華萬里南遷夜郎國
三年歸及長風沙聞道青雲貴公子錦帆遊戲西江水
人疑天上坐樓船水淨霞明兩重綺相約相期何太深
棹歌搖艇月中尋不同珠履三千客別欲論交一片心

贈漢陽輔錄事

鸚鵡洲橫漢陽渡水引寒煙沒江樹南浦登樓不見君
君今罷官在何處漢口雙魚白錦鱗令傳尺素報情人

其中字數無多少祇是相思秋復春

贈潘侍御論錢少陽

繡衣柱史何昂藏鐵冠白筆橫秋霜三軍論事多引納
塔前虎士羅干將雖無二十五老者且有一翁錢少陽
眉如松雪齊四皓調笑可以安儲皇君能禮此最下士
九州拭目瞻清光

調笑成章雅言
俚言無所不可

早春寄王漢陽

聞道春還未相識走傍寒梅訪消息昨夜東風入武昌
陌頭楊柳黃金色碧水浩浩雲茫茫美人不來空斷腸
預拂青山一片石與君連日醉壺觴

一起四語乃詩家

推調然語氣自老

金陵歌送別范宣

石頭巉巖如虎踞凌波欲過滄江去鍾山龍盤走勢來
秀色橫分歷陽樹四十餘帝三百秋功名事跡隨東流
白馬小兒誰家子泰清之歲來關囚金陵昔時何壯哉

席卷英豪天下來冠蓋散為煙霧盡金輿玉座成寒灰
扣劍悲吟空吐嗟梁陳白骨亂如麻天子龍沈景陽井
誰歌玉樹後庭花此地傷心不能道目下離離長春草
送爾長江萬里心他年來訪南山老

峨眉山月歌送蜀僧晏入中京

我在巴東三峽時西看明月憶峨眉月出峨眉照滄海
與人萬里長相隨黃鶴樓前月華白此中忽見峨眉客
峨眉山月還送君風吹西到長安陌長安大道橫九天

蛾眉山月照秦川黃金獅子承高座白玉麈尾談重玄
我似浮雲殢吳越君逢聖主遊丹闕一振高名滿帝都
歸來還弄峨眉月

白雲歌送友人

楚山秦山多白雲白雲處處長隨君君入楚山裏雲亦
隨君渡湘水湘水上女蘿衣白雲堪卧君早歸

起

送程劉二侍御兼獨孤判官赴安西幕府

安西幕府多材雄
喧喧唯道三數公
繡衣貂裘明積雪
飛書走檄如飄風
朝辭明主出紫宮
銀鞍送別金城空
天外飛霜下葱海
火旗雲馬生光彩
胡塞塵清計日歸
漢家草綠遥相待

同王昌齡送族弟襄歸桂陽

爾家何在瀟湘川
青莎白石長江邊
昨夢江花照江月
幾枝正發東牕前
覺來欲往心悠然
魂隨越鳥飛南天
秦雲連山海相接
桂水橫煙不可涉
送君此去令人愁

風帆茫茫隔河洲
春潭瓊草綠可折
西寄長安明月樓

送族弟綰從軍安西

綰一作綰

漢家兵馬乘北風
鼓行而西破犬戎
爾隨漢將出門去
剪虜若草收奇功
君王按劍望邊色
旄頭已落胡天空
匈奴繫頸數應盡
明年應入蒲萄宮

駢翫

金陵酒肆留別

風吹柳花滿店香
吳姬壓酒喚客嘗
金陵子弟來相送

欲行不行各盡觴請君試問東流水別意與之誰短長

氣滿

余嘗見一人詩云風吹滿店柳花香此直謂柳花
乃香耳因謂友人陳文叔云李太白謂風吹柳花
滿店香此第謂春氣襲人風來香滿此香不必自
揚柳來也 張九齡詠芍藥謂香聞鄭國詩詩芍
藥無香鄭詩亦未嘗言芍藥香詩家之意况風味
難以迹
泥如此

南陵別兒童入京

白酒新熟山中歸黃雞啄黍秋正肥呼童烹雞酌白酒
兒女嬉笑牽人衣高歌取醉欲自慰起舞落日爭光輝

游說萬乘古不早着鞭跨馬涉遠道會稽愚婦輕買臣
余亦辭家西入秦仰天大笑出門去我輩豈是蓬蒿人

把酒問月

故人賈淳
今余問之

青天有月來幾時我今停杯一問之人攀明月不可得
月行却與人相隨皎如飛鏡臨丹闕綠煙滅盡清輝發
但見宵從海上來寧知曉向雲間沒白兔搗藥秋復春
嫦娥孤棲與誰鄰今人不見古時月今月曾經照古人
古人今人若流水共看明月皆如此唯願當歌對酒時

月光長照金樽裏

當是古人不見今時月想流傳之誤

勞勞亭歌

金陵勞勞送客堂
蔓草離離生道傍
古情不盡東流水
此地悲風愁白楊
我乘素舸同康樂
朗詠清川飛夜霜
昔聞牛渚吟五章
今來何謝袁家郎
苦竹寒聲動秋月
獨宿空簾歸夢長

不必他奇氣格

聲調高視一世

當塗趙炎少府粉圖山水歌

蛾眉高出西極天羅浮直與南溟連名公繹思揮彩筆
驅山走海置眼前滿堂空翠如可掃赤城霞氣蒼梧煙
洞庭瀟湘意渺緜三江七澤情迴沿驚濤洶湧向何處
孤舟一去迷歸年征帆不動亦不旋飄如隨風落天邊
心搖目斷興難盡幾時可到三山巔西峰崢嶸噴流泉
橫石蹙水波潺湲東崖合沓蔽輕霧深林雜樹空芊緜
此中冥昧失晝夜隱几寂聽無鳴蟬長松之下列羽客
對坐不語南昌仙南昌仙人趙夫子妙年歷落青雲士

訟庭無事羅衆賓杳然如在丹青裏五色粉圖安足珍
真仙可以全吾身若待功成拂衣去武陵桃花笑殺人

韻詞
佳

江夏贈韋南陵冰

胡驕馬驚沙塵起胡雛飲馬天津水君為張掖近酒泉
我竄三巴九千里天地再新法令寬夜郎遷客帶霜寒
西憶故人不可見東風吹夢到長安寧期此地忽相遇
驚喜茫如墮烟霧玉簫金管喧四筵苦心不得申長句

昨日繡衣傾綠樽病如桃李竟何言昔騎天子大宛馬
今乘欵段諸侯門賴遇南平豁方寸復兼夫子持清論
有似山開萬里雲四望青天解人悶人悶還心悶苦辛
長苦辛愁來飲酒二千石寒灰重煖生陽春山公醉後
能騎馬別是風流賢主人頭陀雲月多僧氣山水何曾
稱人意不然鳴笳按鼓戲滄流呼取江南兒女歌棹謳
我且為君搥碎黃鶴樓君亦為吾倒却鸚鵡洲赤壁爭
雄如夢裏且須歌舞寬離憂

贈從弟南平太守之選

少年不得意落魄無安居願隨任公子欲釣吞舟魚常
時飲酒逐風景壯心遂與功名疎蘭生谷底人不鋤雲
在高山空卷舒漢家天子馳駟馬赤車蜀道迎相如天
門九重謁聖人龍顏一解四海春彤庭左右呼萬歲拜
賀明主收沈淪翰林秉筆迴英眄麟閣崢嶸誰可見承
恩初入銀臺門著書獨在金鑾殿龍駒雕鏤白玉鞍象
牀綺食黃金盤當時笑我微賤者却來請謁為交歡一

朝謝病遊江海疇昔相知幾人在前門長揖後門關今
日結交明日改愛君山嶽心不移隨君雲霧迷所為夢
得池塘生春草使我長價登樓詩別後遙傳臨海作可
見羊何共和之

贈裴十四

朝見裴叔則朗如行玉山黃河落天走東海萬里寫入
胸懷間身騎白黿不敢度金高南山買君顧徘徊六合
無相知飄若浮雲且西去

憶舊遊寄譙郡元參軍

憶昔洛陽董糟丘為予天津橋南造酒樓黃金白璧買
歌笑一醉累月輕王侯海內賢豪青雲客就中與君心
莫逆迴山轉海不作難傾情倒意無所惜我向淮南攀
桂枝君留洛北愁夢思不忍別還相隨相隨迢迢訪仙
城三十六曲水迴縈一谿初入千花明萬壑度盡松風
聲銀鞍金絡倒平地漢東太守來相迎紫陽之真人邀
我吹玉笙餐霞樓上動仙樂嘈然宛似鸞鳳鳴袖長管

催欲輕舉漢中太守醉起舞手持錦袍覆我身我醉橫
眠枕其股當筵意氣凌九霄星離雨散不終朝分飛楚
關山水遙予既還山尋故巢君亦歸家渡渭橋君家嚴
君勇貔虎作尹并州遏戎虜五月相呼度太行推輪不
道羊腸苦行來北涼歲月深感君貴義輕黃金瓊杯綺
食青玉案使我醉飽無歸心時時出向城西曲晉祠流
水如碧玉浮舟弄水簫鼓鳴微波龍鱗莎草綠興來攜
妓恣經過其若楊花似雪何紅妝欲醉宜斜日百尺清

潭寫翠娥翠娥嬋娟初月輝美人更唱舞羅衣清風吹
歌入空去歌曲自繞行雲飛此時歡樂難再遇西遊因
獻長楊賦北闕青雲不可期東山白首還歸去渭橋南
頭一遇君鄮臺之北又離羣問余別恨今多少落花春
暮爭紛紛言亦不可盡情亦不可極呼兒長跪緘此辭
寄君千里遙相憶

廬山謠寄盧侍御虛舟

我本楚狂人鳳歌笑孔丘手持綠玉杖朝別黃鶴樓五

嶽尋仙不辭遠一生好入名山遊廬山秀出南斗傍屏
風九疊雲錦張影落明湖青黛光金闕前開二峯長銀
河倒挂三石梁香爐瀑布遙相望迴崖沓嶂凌蒼蒼翠
影紅霞映朝日鳥飛不到吳天長登高壯觀天地間大
江茫茫去不還黃雲萬里動風色白波九道流雪山好
為廬山謠興因廬山發閒窺石鏡清我心謝公行處蒼
苔沒早服還丹無世情琴心三疊道初成遙見仙人綵
雲裏手把芙蓉朝玉京先期汗漫九垓上願接盧敖遊

太清

酬殷明佐見贈五雲裘歌

明佐一作佐明

我吟謝朓詩上語朔風颯颯吹飛雨謝朓已沒青山空
後來繼之有殷公粉圖珍裘五雲色曄如晴天散彩虹
文章彪炳光陸離應是素娥玉女之所為輕如松花落
金粉濃似苔錦含碧滋遠山積翠橫海島殘霞飛丹映
江草凝毫采掇花霧容幾年功成奪天造故人贈我我
不違著令山水含清輝頓驚謝康樂詩興生我衣襟前

林壑斂暝色袖上煙霞收夕霏羣仙長歎驚此物千崖
萬嶺相縈鬱身騎白鹿行飄飄手翳紫芝笑披拂相如
不足誇鷓鴣王恭鶴氅安可方瑤臺雪花數千點片片
吹落春風香為君持此凌蒼蒼上朝三十六玉皇下窺
夫子不可及矯首相思空斷腸

早秋單父南樓酬竇公衡

白露見日滅紅顏隨霜凋別君若俯仰春芳辭秋條秦
山嵯峨夏雲在疑是白波漲東海散為飛雨川上來遙

惟却卷清浮埃知君獨坐青軒下此時結念同所懷我
閉南樓看道書幽簾清寂在仙居曾無好事來相訪賴
爾高文一起予

答王十二寒夜獨酌有懷

昨夜吳中雪子猷佳興發萬里浮雲卷碧山青天中道
流孤月孤月滄浪河漢清北斗錯落長庚明懷余對酒
夜霜白玉牀金井冰崢嶸人生飄忽百年內且須酣暢
萬古情君不能狸膏金距學鬪雞坐令鼻息吹虹霓君

不能學哥舒橫行青海夜帶刀西屠石堡取紫袍吟詩
作賦北牕裏萬言不直一杯水世人聞此皆掉頭有如
東風射馬耳魚目亦笑我請與明月同驕驕拳跼不能
食蹇驢得志鳴春風折楊皇華合流俗晉君聽琴枉清
角巴人誰肯和陽春楚地由來賤竒璞黃金散盡交不
成白首為儒身被輕一談一笑失顏色蒼蠅貝錦誼謗
聲曾參豈是殺人者讒言三及慈母驚與君論心握君
手榮辱於余亦何有孔聖猶聞傷鳳麟董龍更是何難

狗一生傲岸苦不諧
恩疎媒勞志多乖
嚴陵高揖漢天子
何必長劍挂頤事
玉階達亦不足貴
窮亦不足悲
韓信羞將絳灌比
禍衡恥逐屠沽兒
君不見李北海
英風豪氣今何在
君不見裴尚書
土墳三尺蒿棘居
少年早欲五湖去
見此彌將鐘鼎疎

夢遊天姥吟留別東魯諸公

海客談瀛洲
煙濤微茫信難求
越人語天姥
雲霓明滅或可覩
天姥連天向天橫
勢拔五嶽掩赤城
天台四萬

八千丈對此欲倒東南傾我欲因之夢吳越一夜飛度
鏡湖月湖月照我影送我至剡谿謝公宿處今尚在淥
水蕩漾清猿啼脚着謝公屐身登青雲梯半壁見海日
空中聞天雞千巖萬轉路不定迷花倚石忽已暝熊咆
龍吟殷巖泉慄深林兮驚層巔雲青青兮欲雨水澹澹
兮生煙列缺霹靂丘巒崩摧洞天石扉訇音轟然中開青
冥浩蕩不見底日月照耀金銀臺霓為衣兮風為馬雲
之君兮紛紛而來下虎鼓瑟兮鸞回車仙之人兮列如

麻忽魂悸以魄動，恍驚起而長嗟。惟覺時之枕席失，向來之煙霞。世間行樂亦如此，古來萬事東流水。別君去兮何時還，且放白鹿青崖間。須行即騎訪名山，安能摧眉折腰事權貴。使我不得開心顏。

鳴臯歌送岑徵君

時梁園三尺雪
在清泠池作

若有人兮思鳴臯，阻積雪兮心煩勞。洪河凌兢不可以徑度，冰龍鱗兮難容舳。邈仙山之峻極兮，聞天籟之嘈嘈。霜崖縞皓以合沓兮，若長風扇海湧滄溟之波濤。玄

猿綠羆舐硃峯危柯振石駭膽慄魄羣呼而相號峯
崢嶸以路絕挂星辰於巖敷送君之歸兮動鳴臯之新
作交鼓吹兮彈絲觴清冷之池閣君不行兮何待若反
顧之黃鶴掃梁園之羣英振大雅於東洛中征軒兮歷
阻折尋幽居兮越巘粵盤白石兮坐素月琴松風兮寂
萬壑望不見兮心氛氳蘿冥冥兮霰紛紛水橫洞以下
淥波小聲而上聞虎嘯谷而生風龍藏谿而吐雲寡鶴
清唳饑鼯嘖呻塊獨處此幽默兮愀空山而愁人雞聚

族以爭食鳳孤飛而無鄰
螻蛄嘲龍魚目混珍
嫫母衣錦西施負薪
若使巢由桎梏於軒冕
兮亦奚異乎變龍
蹶蒲結切躡音薛於風塵
哭何苦而救楚
笑何誇而却秦
吾誠不能學二子
沽名矯節以耀世
兮固將棄天地而遺
身白鷗兮飛來長與君兮相親

鳴臯歌奉餞從翁清歸五厓山居

憶昨鳴臯夢裏還
手弄素月清潭間
覺時枕席非碧山
側身西望阻秦關
麒麟閣上春還早
著書却憶伊陽好

青松來風吹石道綠蘿飛花覆煙草我家仙翁愛清真
才雄草聖凌古人欲卧鳴臯絕世塵鳴臯微茫在何處
五崖峽水橫樵路身披翠雲裘袖拂紫煙去去時應過
嵩少間相思為折三花樹

魯郡堯祠送竇明府薄華還西京

時久病
初起作

朝策犂眉驅舉鞭力不堪強扶愁疾向何處角巾微服
堯祠南長楊掃地不見日石門噴作金沙潭笑誇故人
指絕境山光水色青於藍廟中往往來擊鼓堯本無心

爾何苦門前長跪雙石人有女如花日歌舞銀鞍繡轂
往復迴簸林蹶石鳴風雷遠煙空翠時明滅白鷗歷亂
長飛雪紅泥亭子赤闌干碧流環轉青錦湍深沈百丈
洞海底那知不有蛟龍蟠君不見綠珠潭水流東海綠
珠紅粉沈光彩綠珠樓下花滿園今日曾無一枝在昨
夜秋聲閭闔來洞庭木落騷人哀遂將三五少年輩登
高遠望形神開生前一笑輕九鼎魏武何悲銅雀臺我
歌白雲倚牕牖爾聞其聲但揮手長風吹月度海來遙

勸仙人一杯酒酒中樂酣宵向分舉觴酌堯堯可聞何
不令臯陶擁篲橫八極直上青天揮浮雲高陽小飲真
瑣瑣山公酌酹何如我竹林七子去道賒蘭亭雄筆安
足誇堯祠笑殺五湖水至今憔悴空荷花爾向西秦我
東越暫向瀛洲訪金闕藍田太白若可期為余掃灑石
上月

單父東樓秋夜送族弟沈之秦

時凝弟
在席

爾從咸陽來問我何勞苦沐猴而冠不足言身騎土牛

滯東魯沈弟欲行凝弟留孤飛一鴈秦雲秋坐來黃葉
落四五北斗已挂西城樓絲桐感人絃亦絕滿堂送君
皆惜別卷簾見月清興來疑是山陰夜中雪明日斗酒
別惆悵清路塵遙望長安日不見長安人長安宮闕九
天上此地曾經為近臣一朝復一朝髮白心不改屈原
憔悴滯江潭亭伯流離放遼海折翮翻飛隨轉蓬聞弦
虛墜下霜空聖朝久棄青雲士他日誰憐張長公

灞陵行送別

送君灞陵行灞水流浩浩
上有無花之古樹下有傷心
之春草我向秦人問路歧
云是王粲南登之古道古道
連綿走西京紫闕落日浮雲生
正當今夕斷腸處驪歌
愁絕不忍聽

送別

尋陽五谿水沿洄直入巫山裏
勝境由來人共傳君到
南中自稱美送君別有八月秋
颯颯蘆花復益愁雲帆
望遠不相見日暮長江空自流

送祝八之江東賦得浣紗石

西施越谿女明艷光雲海未入吳王宮殿時浣紗古石
今猶在桃李新開映古查菖蒲猶短出平沙昔時紅粉
照流水今日青苔覆落花君去西秦適東越碧山清江
幾起忽若到天涯思故人浣紗石上窺明月

宣州謝朓樓餞校書叔雲

棄我去者昨日之日不可留亂我心者今日之日多煩
憂長風萬里送秋鴈對此可以酣高樓蓬萊文章建安

骨中間小謝又清發俱懷逸興壯思飛欲上青天覽日
月抽刀斷水水更流舉杯銷愁愁更愁人生在世不稱
意明朝散髮弄扁舟

雄情逸調

高莫可攀

攜妓登梁王樓霞山孟氏桃園中

碧草已滿地柳與梅爭春謝公自有東山妓金屏笑坐
如花人今日非昨日明日還復來白髮對綠酒強歌心
已摧君不見梁王池上月昔照梁王樽酒中梁王已去

明月在黃鸝愁醉啼春風分明感激眼前事莫惜醉卧
桃園東

下途歸石門舊居

吳山高越水清握手無言傷別情將欲辭君挂帆去離
魂不散煙郊樹此心鬱悵誰能論有愧叨承國士恩雲
物共傾三月酒歲時同餞五侯門羨君素書常滿案含
丹照白霞色爛余嘗學道窮冥筌夢中往往遊仙山何
當脫屣謝時去壺中別有日月天俛仰人間易凋朽鍾

峯五雲在軒牖惜別愁窺玉女牕歸來笑把洪厓手隱
居寺隱居山陶公鍊液栖其間靈神閉氣昔登攀恬然
但覺心緒閒數人不知幾甲子昨夜猶帶冰霜顏我離
雖則歲物改如今了然識所在別君莫道不盡歡懸知
樂客遙相待石門流水徧桃花我亦曾到秦人家不知
何處得雞豕就中仍見繁桑麻翛然遠與世事間裝鸞
駕鶴又復遠何必遠從七貴遊勞生徒聚萬金產揖君
去長相思雲遊雨散從此辭欲知悵別心易苦向暮春

風揚柳絲

同族弟金城尉叔卿燭照山水壁畫歌

叔一作升

高堂粉壁圖蓬瀛燭前一見滄洲清
洪波洶湧山崢嶸皎若丹丘隔海望
赤城光中乍喜嵐氣滅謂逢山陰晴
後雪迴谿碧流寂無喧又如秦人月下
窺花源了然不覺清心魂祇將疊嶂鳴
秋猿與君對此歡未歇放歌行吟達
明發却顧海客揚雲帆便欲因之向溟
渤

觀博平王志安少府山水粉壁

粉壁為空天丹青壯江海游雲不知歸日見白鷗在博
平真人王志安沈吟至此願挂冠松谿石磴帶秋色愁
客思歸帶曉寒

思邊

去年何時君別妾南園綠草飛蝴蝶今歲何時妾憶君
西山白雪暗秦雲玉關去此三千里欲寄音書那得聞
怨情

新人如花雖可寵故人似玉由來重花性飄揚不自持

玉自皎潔終不移故人昔新今尚故還見新人有故時
請看陳后黃金屋寂寂珠簾生網絲

寄遠

憶昨東園桃李紅碧枝與君此時初別離金瓶落井無
消息令人行歎復坐思坐思行歎成楚越春風玉顏畏
銷歇碧牕紛紛下落花青樓寂寂空明月兩不見但相
思空留錦字表心素至今緘愁不忍窺

愛君芙蓉嬋娟之艷色若可餐兮難再得憐君冰玉清

迴之明心情不極兮意已深朝共琅玕之綺食夜同鴛
鴦之錦衾恩情婉孌忽為別使人錯莫亂愁心亂愁心
涕如雪寒燈厭夢魂欲絕覺來相思悲白髮盈盈漢水
若可越可惜凌波步羅襪美人美人兮歸去來莫作朝
雲暮雨兮飛陽臺

對酒

蒲萄酒金巨音頗羅吳姬十五細馬馱青黛畫眉紅錦靴
道字不正嬌唱歌玳瑁筵中懷裏醉芙蓉帳底奈君何

代美人愁鏡

美人贈此盤龍之寶鏡
燭我金縷之羅衣
時將紅袖拂明月
為惜普照之餘輝
影中金鵲飛不滅
臺下青鸞思獨絕
葦砧一別若箭弦
去有日來無年
狂風吹却妾心
斷玉筋并墮菱花前

示金陵子

金陵城東誰家子
竊聽琴聲碧牕裏
落花一片天上來
隨人直渡西江水
楚歌吳語嬌不成
似能未能最有情

謝公正要東山妓攜手林泉處處行

菩薩蠻

平林漠漠煙如織寒山一帶傷心碧暝色入高樓有人
樓上愁玉階空佇立宿鳥歸飛急何處是歸程長亭更
短亭

憶秦娥

簫聲咽秦娥夢斷秦樓月秦樓月年年柳色灞陵傷別
樂遊原上清秋節咸陽古道音塵絕音塵絕西風殘照

漢家陵闕

三五七言

秋風清秋月明落葉聚還散寒鴉棲復驚相思相見知
何日此時此夜難為情



唐詩鏡卷十九

欽定四庫全書

集部
唐詩鏡卷
二十三

詳校官庶吉士臣范逢恩

主事銜臣徐以坤覆勘

總校官編修臣王燕緒

校對官編修臣張燾

謄錄監生臣陳雷

欽定四庫全書

唐詩鏡卷二十

明 陸時雍 編

盛唐第十二

李白四

五言律詩

宮中行樂詞

杜傳云玄宗坐沈香亭子意有所感欲得白為樂章召入而白已醉左右以水頰面稍解撥筆成文

婉麗精切無留思按紀
事指為宮中行樂詞也

柳色黃金嫩梨花白雪香
玉樓巢翡翠金殿鎖鴛鴦
選妓隨雕輦徵歌出洞房
宮中誰第一飛燕在昭陽

塞下曲三首

五月天山雪無花祇有寒
笛中聞折柳春色未曾曉
戰隨金鼓宵眠抱玉鞍
願將腰下劍直為斬樓蘭
駿馬似風颭鳴鞭出渭橋
彎弓辭漢月抽羽破天驕
陣解星芒盡營空海霧銷
功成畫麟閣獨有霍嫖姚

塞虜乘秋下天兵出漢家將軍分虎竹戰士卧龍沙邊
月隨弓影胡霜拂劍花玉關殊未入少婦莫長嗟

祇是語
氣高貴

從軍行

從軍玉門道逐虜金微山笛奏梅花曲刀開明月環鼓
聲鳴海上兵氣擁雲間願斬單于首長驅靜鐵關

鳳臺曲

常聞秦帝女傳得鳳凰聲是日逢仙子當時別有情人

吹綠簫去天借綠雲迎曲在身不返空餘弄玉名

三四
意迴

紫騮馬

紫騮行且嘶雙翻碧玉蹄臨流不肯渡似惜錦障泥
白雪關山遠黃雲海戍迷揮鞭萬里去安得念春閨

長信怨

月皎昭陽殿霜清長信宮天行乘玉輦飛燕與君同
更有歡娛處承恩樂未窮誰憐團扇妾獨坐怨秋風

五六言
情入妙

秋思

關氏黃葉落妾望自登臺海上碧雲斷單于秋色來胡
兵沙塞合漢使玉關回征客無歸日空悲蕙草摧

一起迥出三四如寒
玉品冰品所最貴

侍從遊宿溫泉宮作

羽林十二將羅列應星文霜仗懸秋月霓旌卷夜雲嚴
更千戶肅清樂九天聞日出瞻佳氣葱葱繞聖君

口號贈楊徵君鴻

此公時
被召

陶令辭彭澤梁鴻入會稽我尋高士傳君與古人齊雲
卧留丹壑天書降紫泥不知楊伯起早晚向關西

步
驟

贈崔秋浦

河陽花作縣秋浦玉為人地逐名賢好風隨惠化春水
從天漢落山逼畫屏新應念金門客投沙弔楚臣

南陽送客

斗酒勿為薄寸心貴不忘坐惜故人去偏令遊子傷離
顏怨芳草春思結垂楊揮手再三別臨岐空斷腸

一起四語是
本色當家

送張舍人之江東

張翰江東去正值秋風時天清一鴈遠海濶孤帆遲白
日行欲暮滄波杳難期吳洲如見月千里幸相思

送白利從金吾董將軍西征

西羌延國討白起佐軍威劔決浮雲氣弓彎明月輝馬

行邊草綠旌卷曙霜飛抗手凜相顧寒風生鐵衣

結語有色弓弩明月輝此便是率語

送友人

青山橫北郭白水遶東城此地一為別孤蓬萬里征浮雲遊子意落日故人情揮手自茲去蕭蕭班馬鳴

三四
有氣

送友人入蜀

見說蠶叢路崎嶇不易行山從人面起雲傍馬頭生芳

樹籠秦棧春流遠蜀城升沈應已定不必問君平

三四語佳
第未秀聳

江夏送張丞

欲別心不忍臨行情更親酒傾無限月客醉幾重春藉
草依流水攀花贈遠人送君從此去回首泣迷津

三四是
便語

秋登宣城謝朓北樓

江城如畫裏山曉望晴空兩水夾明鏡雙橋落彩虹人

煙寒橘柚秋色老梧桐誰念北樓上臨風懷謝公

五六清老秀出

是天際人語

題江夏靜修寺

此寺本李北海舊宅

我家北海宅作寺南江濱空庭無玉樹高殿坐幽人書帶留青草琴臺暮素塵平生種桃李寂滅不成春

太原早秋

歲落衆芳歇時當大火流霜威出塞早雲色渡河秋夢遶邊城月心飛故國樓思歸若汾水無日不悠悠

觀胡人吹笛

胡人吹玉笛一半是秦聲十月吳山曉梅花落敬亭愁
聞出塞曲淚滿逐臣纓却望長安道空懷戀主情

三四愁緒
片片欲墮

初唐以律行古局踰不伸盛唐以古行律其體遂敗
良馬之妙在折旋蟻封豪士之奇在規矩妙應若恃
才一往非善之善也對酒憶賀監宿五松山下荀媼
家宿巫山下夜泊牛渚懷古清音秀骨夫豈不佳第
非律體所宜耳

附對酒憶賀監 四明有狂客風流賀季真長安一
相見呼我謫仙人昔好杯中物今為松下塵金龜換
酒處却憶淚沾巾

附宿五松山下荀媪家 我宿五松下寂寥無所散
田家秋作苦鄰女夜春寒 晚進雕胡飯月光明素盤

令人憶漂母三謝不能餐

附宿巫山下 昨夜巫山下猿聲夢裏長 桃花飛綠

水三月下瞿塘 雨色風吹去南行 逢楚王高丘懷宋
玉訪古一霑裳

附夜泊牛渚懷古 牛渚西江夜青天無片雲登舟
望秋月空憶謝將軍 余亦能高詠斯人不可聞 明朝

挂帆席楓葉落紛紛

詩太近人其病有二 淺而近人者率也 易而近人者

俗也 如渡荆門送別諸詩不免此病

附渡荆門送別 渡遠荆門外來從楚國遊 山隨平

野盡江入大荒流 月下飛天鏡雲生結海樓 仍憐故

鄉水萬里送行舟

附江夏送宋之悌 楚水清若空遙將碧海同人分

千里外興在一杯中 谷鳥吟晴日江猿嘯晚風平生

不下淚於此泣無窮

附尋雍尊師隱居

羣峭碧摩天逍遙不計年撥雲

尋古道倚樹聽流泉花暖青牛卧松高白鶴眠語來
江色暮獨自下寒煙

附訪戴天山道士不遇

犬吠水聲中桃花帶露濃

樹深時見鹿溪干不聞鐘野竹分青竊飛泉挂碧峯

無人知所去愁倚兩三松

附詠柳少府山廬木樽 蟠木不彫飾且將斤斧疎

樽成山嶽勢材是棟梁餘外與金壘並

中涵五醴虛慙君垂拂拭蓮舂玳筵居

七言律詩

鸚鵡洲

鸚鵡來過吳江水江上洲傳鸚鵡名鸚鵡西飛隴山去

芳洲之樹何青青煙開蘭葉香風煖岸夾桃花錦浪生
遷客此時徒極目長洲孤月向誰明

太白七言絕無蘊措鴟
鵝洲一首氣格高峴

附登金陵鳳凰臺 鳳凰臺上鳳凰遊 鳳去臺空江
自流 吳宮花草埋幽徑 晉代衣冠成古丘 三山半落
青天外 二水中分白鷺洲 總為
浮雲能蔽日 長安不見使人愁

五言排律

中丞宋公以吳兵三千赴河南軍次潯陽脫余
之囚參謀幕府因贈之

獨坐清天下專征出海隅
九江皆渡虎三郡盡還珠
組練明秋浦樓船入郢都
風高初選將月滿欲平胡
殺氣橫千里軍聲動九區
白猿慙劔術黃石借兵符
戎虜行當剪鯨鯢立可誅
自憐非劇孟何以佐良圖

春日歸山寄孟六浩然

朱紱遺塵境青山謁梵筵
金繩開覺路寶筏度迷川
嶺樹攢飛拱巖花覆谷泉
塔形標海月樓勢出江煙
香氣三天下鐘聲萬壑連
荷秋珠已滿松密蓋初圓
鳥聚疑

聞法龍參若護禪愧非流水韻叨入伯牙絃

秋日登揚州西靈塔

寶塔凌蒼蒼登攀覽四荒頂高元氣合標出海雲長萬
象分空界三天接畫梁水搖金剝影日動火珠光鳥拂
瓊簾度霞連繡栱張目隨征路斷心逐去帆揚露濯梧
楸白霜催橘袖黃玉毫如可見於此照迷方

五言絕句

王昭君

昭君拂玉鞍上馬啼紅頰今日漢宮人明朝胡地妾

玉階怨

玉階生白露夜久侵羅襪却下水晶簾玲瓏望秋月

靜夜思

牀前看月光疑是地上霜舉頭望山月低頭思故鄉

淶水曲

淶水明秋日南湖采白蘋荷花嬌欲語愁殺蕩舟人

自遣

對酒不覺暝落花盈我衣醉起步谿月鳥還人亦稀

怨情

美人捲珠簾深坐顰蛾眉但見淚痕濕不知心恨誰

六朝五言絕意致既深風華復絢唐人即古其貌而不古其意古其意而不古其韵如秋浦歌勞勞亭古意蕩然矣詩之所以貴古者以情深也以格老也以色麗也以句警也

秋浦歌

秋浦錦駝鳥人間天上稀山雞羞涿水不敢照毛衣
白髮三千丈緣愁似箇長不知明鏡裏何處得秋霜

勞勞亭

天下傷心處勞勞送客亭
春風知別苦不遣柳條青

七言絕句

清平調詞三首

樂史序云開元禁中初重木芍藥即今牡丹得四
本紅紫淺紅通白者上因移植于興慶池東沈香
亭前會花方繁開上乘照夜車太真以步輦從詔
選梨園子弟將欲歌之上曰賞名花對妃子馬用
舊樂遽命李龜年持金花箋宣賜白立進清平調
辭三章白援筆賦之云云命梨園子弟約畧調撫
絲竹促李龜年歌之太真持頗黎七寶杯酌西涼
州蒲萄酒笑領歌辭上因調玉笛以倚曲每曲偏

將換則遲其聲以媚之太真飲罷斂繡中重拜異
日太真重吟前辭力士終以脫靴為耻乃曰以飛
燕指妃子賤之甚矣太真深然之上
嘗歎命白官卒為宮中所捍而止

雲想衣裳花想容春風拂檻露華濃若非羣玉山頭見
會向瑤臺月下逢

一枝紅豔露凝香雲雨巫山枉斷腸借問漢宮誰得似
可憐飛燕倚新妝

名花傾國兩相歡常得君王帶笑看解釋春風無限恨
沈香亭北倚闌干

氣局
寬轉

結韉子

燕南壯士吳門豪
筑中置鉛魚
隱刀感君恩
重許君命
太山一擲輕鴻毛

少年行

五陵年少金市東
銀鞍白馬度春風
落花踏盡遊何處
笑入吳姬酒肆中

軍行

騮馬新跨白玉鞍戰罷沙場月色寒城頭鐵鼓聲猶震
匣裏金刀血未乾

從軍行

百戰沙場碎鐵衣城南已合數重圍突營射殺呼延將
獨領殘兵千騎歸

長門怨二首

天迴北斗挂西樓金屋無人螢火流月光欲到長門殿
別作深宮一段愁

桂殿長愁不記春
黃金四屋起秋塵
夜懸明月青天上
獨照長門宮裏人

二詩用意高妙 氣格雄深 夜懸明月青天上
獨照長門宮裏人 倒頓絕佳 若一直寫下 氣索然
矣

上皇西巡南京歌

按玄宗本紀天寶十四載祿
山反十五載詔親征七月次

蜀郡八月皇太子即位靈武十月復京師十
二月上皇天帝至自蜀郡大赦以蜀郡為南
京

劍閣重關蜀北門
上皇歸馬若雲屯
少帝長安開紫極

雙懸日月照乾坤

峨眉山月歌

峨眉山月半輪秋影入平羌
江水流夜發清谿向三峽
思君不見下渝州

渾然
之妙

橫江詞

橫江館前津吏迎向余東指海雲生
郎今欲渡緣何事
如此風波不可行

直是無不可
詩種種入妙

客中行

蘭陵美酒鬱金香
玉碗盛來琥珀光
但使主人能醉客
不知何處是他鄉

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

贈汪倫

李白乘舟將欲行忽聞岸上踏歌聲
桃花潭水深千尺不及汪倫送我情

妙於
言情

聞王昌齡左遷龍標尉遙有此寄

楊花落盡子規啼聞道龍標過五谿
我寄愁心與明月隨風直到夜郎西

寄月隨風
何所不到

山中問答

問余何事栖碧山笑而不答心自閒
桃花流水杳然去別有天地非人間

此是謫
仙語

答湖州迦葉司馬問白是何人

青蓮居士謫仙人酒肆藏名三十春
湖州司馬何須問金粟如來是後身

黃鶴樓送孟浩然之廣陵

故人西辭黃鶴樓煙花三月下揚州
孤帆遠影碧空盡

惟見長江天際流

送外甥鄭灌從軍

丈八蛇矛出隴西
彎弧拂箭白猿啼
破胡必有龍韜策
積甲應將熊耳齊

望天門山

天門中斷楚江開
碧水東流直北迴
兩岸青山相對出
孤帆一片日邊來

秋下荊門

霜落荆門江樹空
布帆無恙挂秋風
此行不為鱸魚膾
自愛名山入剡中

無意無色
自然高妙

蘇臺覽古

舊苑荒臺楊柳新
菱歌清唱不勝春
只今惟有西江月
曾照吳王宮裏人

意轉愈深格轉愈老
只今唯有西江月曾照吳
王宮裏人意想轉入無已
所以見氣局之高

越中覽古

越王勾踐破吳歸義士還家盡錦衣宮女如花滿春殿
只今惟有鷓鴣飛

與史郎中飲聽黃鶴樓上吹笛

飲一作欽

一為遷客去長沙西望長安不見家黃鶴樓中吹玉笛

江城五月落梅花

此與觀胡人吹笛一意高適玉門闕聽吹笛胡人吹笛戍樓間樓上蕭條海色閒借問落梅凡幾曲徒風一夜滿關山便詞費而格卑矣

春夜洛城聞笛

誰家玉笛暗飛聲散入春風滿洛城此夜曲中聞折柳
何人不起故園情

陌上贈美人

駿馬驕行踏落花垂鞭直拂五雲車美人一笑褰珠箔
遙指紅樓是妾家

唐詩鏡卷二十

欽定四庫全書

唐詩鏡卷二十一

明 陸時雍 編

盛唐第十三

杜甫

唐書云字子美，審言孫。天寶中舉進士，不第。秦賦三篇，帝奇之，拜右衛率府胄曹參軍。祿山亂，避走

三川。肅宗立，奔謁行在，拜右拾遺。房琯罷相，上疏言琯不宜免，帝怒，出為華州司功參軍。闕輔饑，客秦州。嚴武節度，餽南表為參謀，檢校工部員外郎。武卒，崔旰等亂，往來梓夔間。大歷中，客耒陽，遊嶽祠。大水遽至，涉旬不得食，縣令具舟迎還，饋牛炙白酒。大醉一夕卒。年五十九。少與李白齊名，時號李杜。

杜子美之勝人者有二思人所不能思道人所不
敢道以意勝也數百言不覺其繁三數語不覺其
簡所謂御衆如御寡擒賊先擒王以力勝也五七
古詩雄視一世奇正雅俗稱題而出各盡所長是
謂武庫五七律詩他人每以情景相和而成本色
不足者往往景饒情乏子美直據本懷借景入情
點鎔成相最為老手然多徑意一往潦倒太甚色
澤未工大都雄於古者每不屑屑於律故知用才
實難古人小物必勤良有以也王摩詰之清微
李太白之高妙杜子美之雄渾三者並稱然而太
白之地
優矣

五言古詩

前出塞

出門日已遠不受徒旅欺
骨肉恩豈斷男兒死無時
走馬脫轡頭手中挑青絲
捷下萬仞岡俯身試搴旗

語如身歷卽身歷者却自不能道 老杜長於造境能造境卽情色種種畢著李青蓮長於造情情到卽境不煩而足

挽弓當挽強用箭當用長
射人先射馬擒賊先擒王
殺人亦有限立國自有疆
苟能制侵陵豈在多殺傷

語語筋力前四語不知何自或是成語或自己出用符合拍總歸佳境

單于寇我壘百里風塵昏
雄劔四五動彼軍為我奔
虜

其名王歸繫頸授轅門潛身備行列一勝何足論

善於自負三四語中有神

後出塞

男兒生世間及壯當封侯戰伐有功業馬能守舊丘召
募赴薊門軍動不可留千金買馬鞍百金裝刀頭閭里
送我行親戚擁道周班白居上列酒酣進庶羞少年別
有贈含笑看吳鉤

未語
有色

朝進東門營暮上河陽橋
落日照大旗馬鳴風蕭蕭
平沙列萬幕部伍各見招
中天懸明月令嚴夜寂寥
悲笳數聲動壯士慘不驕
借問大將軍恐是霍嫖姚

寫景一一入神
色象絕不足道

新安吏

自注云收京後作雖
狀兩京賊猶充斥

客行新安道喧呼聞點兵
借問新安吏縣小更無丁
府帖昨夜下次選中男行
中男絕短小何以守王城
肥男有母送瘦男獨伶俜
白水暮東流青山猶哭聲
莫自使

眼枯收汝淚縱橫眼枯即見骨天地終無情我軍收相
州日夜望其平豈意賊難料歸軍星散營就糧近故壘
練卒依舊京掘壕不到水牧馬役亦輕況乃王師順撫
養甚分明送行勿泣血僕射如父兄

按鄭昂云僕射指郭子儀也

善作苦語

石壕吏

按荅夢弼云石壕屬邠州昔北狄侵太王于此築城壕以禦之因名石壕又卞

園云石壕陝東成在新安西卽石壕也

暮投石壕村有吏夜捉人老翁踰牆走老婦出門看吏

呼一何怒婦啼一何苦聽婦前致詞三男鄴城戍一男
附書至二男新戰生存者且偷生死者長已矣室中更
無人惟有乳下孫孫有母未去出入無完裙老嫗力雖
衰請從吏夜歸急應河陽役猶得備晨炊夜久語聲絕
如聞泣幽咽天明登前途獨與老翁別

其事何長其言何簡吏呼一何怒婦啼一何苦二
語便當數十言寫矣文章家所云要會以去形而
得情去情而得神故也未四語酸楚殊甚嘗觀
王粲七哀詩情事之悲曾不減此然七哀聲色不
動吐納自如若老杜諸作便覺推胸頓足
唾涕俱來矣此古今人所以不相及也

新婚別

兔絲附蓬麻引蔓故不長嫁女與征夫不如棄路傍結
髮為君妻席不煖君床暮婚晨告別無乃太匆忙君行
雖不遠守邊赴河陽妾身未分明何以拜姑嫜父母養
我時日夜令我藏生女有所歸雞犬亦得將君今往死
地沈痛迫中腸誓欲隨君去形勢反蒼黃勿為新婚念
努力事戎行婦人在軍中兵氣恐不揚自嗟貧家女久
致羅襦裳羅襦不復施對君洗紅妝仰視百鳥飛大小

必使翔人事多錯迕與君永相望

此作氣韻不減漢魏妾身未分明何以拜姑嬋建安中亦無此深至語

垂老別

四郊未寧靜垂老不得安子孫陣亡盡焉用身獨完投
杖出門去同行為辛酸幸有牙齒存所悲骨髓乾男兒
既介冑長揖別上官老妻卧路啼歲暮衣裳單孰知是
死別且復傷其寒此去必不歸還聞勸加餐土門壁甚
堅杏園度亦難勢異鄴城下縱死時猶寬人生有離合

豈擇盛衰端憶昔少壯日遲迴竟長歎萬國盡征戍烽
火被岡巒積屍草木腥流血川原丹何鄉為樂土安敢
尚盤桓棄絕蓬室居塌然摧肺肝

語多訣別痛有餘情男兒既介胃
長揖別上官此語猶有少年意氣

無家別

寂寞天寶後園廬但蒿藜我里百餘家世亂各東西存
者無消息死者為塵泥賤子因陣敗歸來尋舊蹊久行
見空巷日瘦氣慘悽但對狐與狸豎毛怒我啼四鄰何

所有一二老寡妻宿鳥戀本枝安辭且窮棲方春獨荷
鋤日暮還灌畦縣吏知我至召令習鼓鞞雖從本州役
內顧無所攜近行止一身遠去終轉迷家鄉既盪盡遠
近理亦齊永痛長病母五年委溝谿生我不得力終身
兩酸嘶人生無家別何以為烝黎

日瘦氣慘悽一語備景略盡故言不必多惟其至
者家鄉既蕩盡遠近理亦齊老杜詩必窮工極苦
使無餘境乃已李
青蓮只指點大意

義鵲行

陰崖有蒼鷹養子黑柏顛白蛇登其巢吞噬恣朝餐雄
飛遠求食雌者鳴辛酸力彊不可制黃口無半存其父
從西歸翻身入長煙斯須領健鶻痛憤寄所宣斗上挾
孤影嗷哮來九天修鱗脫遠枝巨額折老拳高空得蹭
蹬短草辭蜿蜒折尾能一掉飽腸已皆穿生雖滅衆離
死亦垂千年物情有報復快意貴目前茲實鷲鳥最急
難心炯然功成失所往用捨何其賢近經滴水涸此事
樵夫傳飄蕭覺素髮凜欲衝儒冠人生許與分只在顧

盼間聊為義鷲行用激壯士肝

撫情有餘
寫色未細

楊監又出畫鷹十二扇

近時馮紹正能畫鷲鳥樣明公出此圖無乃傳其狀殊
姿各獨立清絕心有向疾禁千里馬氣敵萬人將憶昔
驪山宮冬移含元仗天寒大羽獵此物神俱王當時無
凡材百中皆用壯粉墨形似間識者一惆悵干戈少暇
日真骨老崖嶂為君除狡兔會是翻韉上

題衡山縣文宣王廟新學堂呈陸宰

旄頭芻紫微無復俎豆事金甲相排蕩青衿一憔悴嗚呼已十年儒服敝于地征夫不遑息學者淪素志我行洞庭野歛得文翁肆僦僦冢子行若舞風雩至周室宜中興孔門未應棄是以資雅才煥然立新意衡山雖小邑首唱恢大義因見縣尹心根源舊宮闕講堂非曩構大屋加塗墜下可容百人牆隅亦深邃何必三千徒始壓戎馬氣林木在庭戶密榦壘蒼翠有井朱夏時輓轡

凍階紀耳聞讀書聲殺伐災髣髴故國延歸望衰顏減
愁思南紀收波瀾西河共風味采詩倦跋涉載筆尚可
記高歌激宇宙凡百慎失墜

語壯干戈
宮牆生色

戲贈鄭廣文虔兼呈蘇司業源明

廣文到官舍繫馬堂階下醉即騎馬歸頗遭官長罵才
名三十年坐客寒無種賴有蘇司業時時與酒錢

內可閔鄭
外可觀時

贈衛八處士

按唐史拾遺與衛賓相友善賓年少號為小友

人生不相見動如參與商
今夕復何夕共此燈燭光
少壯能幾時鬢髮各已蒼
訪舊半為鬼驚呼熱中腸
焉知二十載重上君子堂
昔別君未婚兒女忽成行
怡然敬父執問我來何方
問答未及已兒女羅酒漿
夜雨剪春韭新炊間黃粱
主稱會面難一舉累十觴
十觴亦不醉感子故意長
明日隔山嶽世事兩茫茫

此詩情

勝乎詞

贈蘇侯

異縣昔同遊，各云厭轉蓬。別離已五年，尚在行李中。
戎馬日衰息，乘輿安九重。有才何棲棲，將老委所窮。
為郎未為賤，其奈疾病攻。子何面黧黑，馬得豁心胸。
巴蜀倦剽劫，下愚成土風。幽薊已削平，荒徼尚彎弓。
斯人脫身來，豈非吾道東。乾坤雖寬大，所適裝囊空。
肉食欺菜色，少壯欺老翁。況乃主客間，古來偏側同。
君今下荆揚，獨帆如飛鴻。二州豪俠場，人馬皆自雄。
一請甘饑寒，再請

甘養蒙

一請甘饑寒再請甘養蒙此老杜自寫本色語千載文夫當同此調 讀李詩如輕雲飄飄杜詩如

黃河
洶洶

九日寄岑參

出門復入門雨脚但如舊所向泥活活思君令人瘦沈吟坐西軒飲食錯昏晝寸步曲江頭難為一相就吁嗟乎蒼生稼穡不可救安得誅雲師疇能補天漏大明韜日月曠野號禽獸君子強遠迤小人困馳驟維南有崇

山恐與川浸溜是節東籬菊紛披為誰秀岑生多新詩
性亦嗜醇耐采采黃金花何由滿衣袖

出門復入門兩脚但如舊蹤跡宛然采采黃金花
何由滿衣袖情事索莫安得誅雲師疇能補天漏
此老杜最
不老處

有懷台州鄭十八司戶虔

自注云虔時坐
污貶台州司戶

天台隔三江風浪無晨暮鄭公縱得歸老病不識路昔
如水上鷗今若置中兔性命由他人悲辛但狂顧山鬼
獨一脚蝮蛇長如樹呼號傍孤城歲月誰與度從來禦

魑魅多為才名誤，夫子稽阮流。
更被時俗惡，海隅微小吏。
眼暗髮垂素，黃帽映青袍。
非供折腰具，平生一杯酒。
見我故人遇，相望無所成。
乾坤莽迴互。

老抱
牢騷

宿青谿驛奉懷張員外十五兄之緒

青谿驛在
嘉州犍為

縣

漾舟千山內，日入泊枉渚。
我生本飄飄，今復在何許。
石根青楓林，猿鳥聚儔侶。
月明遊子靜，畏虎不得語。
中夜

懷友朋乾坤此深阻浩蕩前後間佳期付荆楚

日明遊子靜畏虎不
得語景色悄然照日

夢李白二首

死別已吞聲生別常惻惻江南瘴癘地逐客無消息故
人入我夢明我長相憶恐非平生魂路遠不可測魂來
楓林青魂返闕塞黑君今在羅網何以有羽翼落月滿
屋梁猶疑照顏色水深波浪濶無使蛟龍得

浮雲終日行遊子久不至三夜頻夢君情親見君意告

歸常局促苦道來不易江湖多風波舟楫恐失墜出門
搔白首苦負平生志冠蓋滿京華斯人獨顛顛孰云網
恢恢將老身反累千秋萬歲名寂寞身後事

是魂是人是夢是親都覺恍惚無定親情苦意無
不備極矣死別已吞聲生別常惻惻便是千情
萬恨出門搔白首苦負平生志彼此懷抱都盡
詩謂語不驚人死不休是以境必扶真語必窮微

此子美
擅長處

送高三十五書記十五韻

高適客河西哥舒
翰表為掌書記

空峒小麥熟且願休王師請公問主將焉用窮荒為饑

鷹未飽肉側翅隨人飛高生跨鞍馬有似并州兒脫身
簿尉中始與蕪楚辭借問今何官觸熱向武威答云一
書記所媿國士知人亦不易知更須慎其儀十年出幕
府自可持旌麾此行既特達足以慰所思男兒功名遂
亦在老大時常恨結歡淺各在天一涯又如參與商慘
慘中腸悲驚風吹鴻鵠不得相追隨黃塵翳沙漠念子
何時歸邊城有餘力早寄從軍詩

肝膽披露 語
氣壯往有餘

送重表姪王珣評事使南海

珣音義與深則屬之屬同

我之曾老姑爾之高祖母爾祖未顯時歸為尚書婦隋朝大業末房杜俱交友長者來在門荒年自餬口家貧無供給客位但箕箒俄頃羞顏珍寂寥人散後入怪鬢髮空吁嗟為之久自陳剪髻鬢鬻市充杯酒上云天下亂宜與英俊厚向竊窺數公經綸亦俱有次問最少年虬髯十八九子等成大名皆因此人手下云風雲合龍虎一吟吼願展丈夫雄得辭兒女醜秦王時在坐真氣

驚戶牖及乎貞觀初尚書踐台斗夫人常肩輿上殿稱
萬壽六宮師柔順法則化妃后至尊均嫂叔盛事垂不
朽鳳雛無凡毛五色非爾曹往者胡作逆乾坤沸噉噉
吾客在馮翊爾家同遁逃爭奪至徒步塊獨委蓬蒿逗
遛熱爾腸十里却呼號自下所騎馬右持腰間刀左牽
紫遊韉飛走使我高苟活到今日寸心銘佩牢亂離又
聚散宿昔恨滔滔水花笑白首春草隨青袍廷評近要
津節制收英髦北驅漢陽傳南汎上瀧舩家聲肯墜地

利器當秋毫番禹親賢領籌運神功操大夫出盧宋寶
貝休脂膏洞主降接武海胡舶千艘我欲就丹砂跋涉
覺身勞安能陷糞土有志乘鯨鰲或駢鸞騰天聊作鶴
鳴臯

喜其款恣上云天下
亂一段更有神色

贈李十五文別

峽人鳥獸居其石附層巔下臨不測江中有萬里船多
疾紛倚薄少留改歲年絕域誰慰懷開顏喜名賢孤陋

忝末戚等級敢比肩
人生意氣合相與
襟袂連一日兩
遣僕三日一共筵
揚論展寸心壯
筆過飛泉玄成
美價
存子山舊業傳
不聞八尺軀常
受衆目憐吾為
辛苦行

蓋彼生事牽北迴
白帝棹南入黔
陽天沂公制方
隅

自注

云沂公李勉也
宗室鄭惠王孫

迴出諸侯先封
內如太古時危
獨蕭然

清高金莖露正直
朱絲絃昔在堯
四岳今之黃潁
川于
邁恨不同所思
無由宣山深水
增波解榻秋露
懸客遊
雖云久亦思月
再圓晨集風渚
亭醉操雲嶠篇
丈夫貴

知己歡罷念歸旋

別蔡十四著作

黃鶴云永泰九年成都尹郭英
人為崔旰所殺時蔡著作扶其

歸
概以

賈生慟哭後寥落無其人
安知蔡夫子高義邁等倫
獻書謁皇帝志已清風塵
流涕灑丹極萬乘為酸辛
天地則瘡痍朝廷多正臣
異才復間出周道日惟新
使蜀見知己別顏始一伸
主人薨城府扶輓歸咸秦
巴道此相逢會我病江濱
憶念鳳翔都聚散卧十春
我衰不足道

但願子意陳稍令社稷安自契魚水親我雖消渴甚敢
忘帝力勤尚思未朽骨復覩耕桑民積水駕三峽浮龍
倚長津揚舲洪濤間仗子濟物身鞍馬下秦塞王城通
北辰玄甲聚不散兵久食恐貧窮谷無粟帛使者來相
因若憑南轅使書札到天垠

別唐十五誠因寄禮部賈侍郎

九載一相逢百年能幾何復為萬里別送子山之阿白
鶴久同林潛魚本同河未知棲集期衰老強高歌歌罷

兩悽惻六龍勿蹉跎相視髮皓白沉難駐羲和胡星墜
燕地漢將仍橫戈蕭條四海內人少豺虎多少人慎莫
投多虎信所過饑有易子食獸猶畏虞羅子負經濟才
天門鬱差峩飄飄適東周來往若崩波南宮吾故人白
馬金盤陀雄筆映千古見賢心靡他念子善師事歲寒
守舊柯為吾謝賈公病肺卧江沱

將適吳楚留別章使君留後兼幕府諸公

得柳字

我來入蜀門歲月亦已久豈惟長兒童自覺成老醜常

恐性坦率失身為杯酒近辭痛飲徒折節萬夫後昔如
縱壑魚今如喪家狗既無遠方戀行止復何有相逢半
新故取別隨薄厚不意青草湖扁舟落吾手眷眷章梓
州開筵俯高柳樓前出騎馬帳下羅賓友健兒簸紅旗
此樂幾難朽日車隱崑崙烏雀噪戶牖波濤未足畏三
峽徒雷吼所憂盜賊多重見衣冠走中原消息斷黃屋
今安否終作適荆蠻安排用莊叟隨雲拜東皇挂席上
南斗有使即寄書無使長回首

同諸公登慈恩寺塔

自注云時高適
薛據先有此作

高標跨蒼穹烈風無時休
自非曠士懷登茲翻百憂
方知象教力足可追冥
搜仰穿龍蛇窟始出枝撐幽
七星在北戶河漢聲西流
羲和鞭白日少昊行清秋
秦山忽破碎涇渭不可求
俯視但一氣焉能辨皇州
回首叫虞舜蒼梧雲正愁
惜哉瑤池飲日晏崑崙丘
黃鶴去不息哀鳴何所投
君看隨陽鴈各有稻粱謀

登高望遠一
往寄情無限

奉同郭給事湯東靈湫作

靈湫在驪山

東山氣鴻濛宮殿居上頭君來必十月樹羽臨九州陰
火煖玉泉噴薄漲巖幽有時浴赤日光抱空中樓閣風
入轍跡廣野延冥搜沸天萬乘動觀水百丈湫幽靈斯
可怪王命官屬休初聞龍用壯劈石摧林丘中夜窟宅
改移因風雨秋倒懸瑤池影屈注蒼江流味如甘露漿
揮弄滑且柔翠旗淡偃蹇雲車紛少留簫鼓蕩四溟異
香泱泱浮鮫人獻微綃曾祝沈豪牛百祥奔盛明古先

莫能傳坡陀金蝦蟇出見蓋有由至尊顧之笑王母不
遣收復歸虛無底化作長黃虬飄飄青鎖郎文彩珊瑚
鈎浩歌淶水曲清絕聽者愁

詭傲

九成宮

在鳳翔本隋仁壽宮唐修之以避暑因更名山有九重故曰九成

蒼山入百里崖斷如杵曰曾宮憑風迴岌業土囊口立
神扶棟宇鑿翠開戶牖其陽產靈芝其陰宿牛斗紛披
長松倒揭嶮怪石走哀猿啼一聲客淚迸林藪荒哉隋

家帝製此今頽朽向使國不亡焉為巨唐有雖無新增
修常置官居守巡非瑤水遠跡是雕牆後我行屬時危
仰望嗟嘆久天王守與符同太白駐馬更搔首

語語如鑿石開
山樞所未有

玉華宮

在坊州
鳳凰谷

谿回松風長蒼鼠竄古瓦不知何王殿遺構絕壁下陰
房鬼火青壞道哀湍瀉萬籟真笙竽秋色正瀟灑美人
為黃土沉乃粉黛假當時侍金輿故物獨石馬憂來藉

草坐浩歌淚盈把冉冉征途間誰是長年者

此詩宋人贊不容口以余觀之特四語耳窅回松風長蒼鼠竄古瓦陰房鬼火青壞道哀湍瀉此直指景色不假點綴信屬老手不知何王殿遺構絕壁下此豈古法萬籟真笙竽秋色正滿灑二語已屬形容美人為黃土況乃粉黛假當時待金輿故物獨石馬數語則迫露之極矣古人題詠渾渾渾斷不如是

晦日尋崔戡李封

朝光入甕牖方寢驚澈裘起行視天宇春氣漸和柔興來不暇懶今晨梳我頭出門無所待徒步覺自由杖藜

復恣意免值公與侯晚定崔李交會心真罕儔每過得
酒傾二宅可淹留喜結仁里歡沉因令節求李生園欲
荒舊竹頗修修引客看掃除隨時成獻酬崔侯初筵色
已畏空樽愁未知天下士至性有此不草芽既青出蜂
聲亦煖遊思見農器陳何當甲兵休上古葛天民不貽
黃屋憂至今阮籍等熟醉為身謀威鳳高其翔長鯨吞
九州地軸為之翻百川皆亂流當歌欲一放淚下恐莫
收濁醪有妙理庶用慰沈浮

兩當縣吳十侍御江上宅

寒城荒煙淡山谷落葉赤陰風千里來吹汝江上宅鷗
雞號枉渚日色傍阡陌借問持斧翁幾年長沙客哀哀
失木狖矯矯避弓翻亦知故鄉樂未敢思宿昔昔在鳳
翔都共通金閨籍天子猶蒙塵東郊暗長戟兵家忌間
謀此輩常接跡臺中領舉劾君必慎剖析不忍殺無辜
所以分黑白上官權許與失意見遷斥仲尼甘旅人向
子識損益朝廷非不知閉口休歎息余時忝諍臣丹陛

實咫尺相看受狼狽至死難塞責行邁心多違出門無
與適於公負明義惆悵頭更白

夏日李公見訪

自注云李時
為太子家令

遠林暑氣薄公子過我遊貧居類村塢僻近城南樓傍
舍頗淳朴所願亦易求隔屋喚西家借問有酒不牆頭
過濁醪展席俯長流清風左右至客意已驚秋巢多衆
鳥喧葉密鳴蟬稠苦遭此物聒孰謂吾廬幽水花晚色
靜庶足充淹留豫恐樽中盡更起為君謀

大雲寺贊公房

燈影照無睡心清聞妙香
夜深殿突兀風動金琅璫
天黑閉春院地清棲暗芳
玉繩回斷絕鐵鳳森翱翔
梵放時出寺鐘殘仍殷床
明朝在沃野苦見塵沙黃

兒童汲井華慣捷瓶在手
露灑不濡地掃除似無帚
明霞爛複閣霧霧寒高隴
側塞被徑花飄颻委墀柳
艱難世事迫隱遁佳期後
晤語契深心那能總箱口
奉辭還杖策暫別終回首
泱泱泥污人斫斫

音銀

國多狗既未免

羈絆時來憩奔走近公如白雪執熱煩何有

燈影照無睡心清聞妙香此語似有契會兒童汲井華慣捷瓶在手霑灑不濡地掃除似無帚綽有

在
禪理

法鏡寺

身危適他州勉強終勞苦神傷山行深愁破崖寺古
嬋碧蘚淨蕭滅寒穉聚洄洄山根水冉冉松上雨洩雲
蒙清晨初日翳復吐朱甍半光炯戶牖粲可數枉策忘
前期出蘿已亭午冥冥子規叫微徑不復取

味堪

咀嚼

北征

黃鶴云公自鳳翔歸鄜州作鄜音孚

皇帝二載秋閏八月初吉杜子將北征蒼茫問家室維
時遭艱虞朝野少暇日顧慙恩私被詔許歸蓬蓽拜辭
詣闕下怵惕久未出雖乏諫諍姿恐君有遺失君誠中
興主經緯固密勿東胡反未已臣甫憤所切揮涕戀行
在道途猶恍惚乾坤合瘡痍憂虞何時畢靡靡踰阡陌
人煙眇蕭瑟所遇多被傷呻吟更流血回首鳳翔縣旌

旗晚明滅前登寒山重屢得飲馬窟邠邠入地底涇水
中蕩滴猛虎立我前蒼崖吼時裂菊垂今秋花石戴古
車轍青雲動高興幽事亦可悅山果多瑣細羅生雜橡
栗或紅若丹砂或黑如點漆雨露之所濡甘苦齊結實
緬思桃源內益歎身世拙坡陀望廊時谷巖互出沒我
行已水濱我僕猶木末鷓鴣鳴黃桑野鼠拱亂穴夜深
經戰場寒月照白骨潼關百萬師往者散何卒遂令半
秦民殘害為異物況我墮胡塵及歸盡華髮經年至茅

屋妻子衣百結慟哭松聲迴悲泉共幽咽平生所驕兒
顏色白勝雪見爺背面啼垢膩脚不韞牀前兩小女補
綻纒過膝海圖圻波濤舊繡移曲折天吳及紫鳳顛倒
在音襤褸老夫情懷惡嘔泄卧數日那無囊中帛救汝
寒凜慄粉黛亦解包衾裯稍羅列瘦妻面復光癡女頭
自櫛學母無不為曉妝隨手抹移時施朱鉛狼籍畫眉
濶生還對童稚似欲忘饑渴問事競挽鬚誰能即嗔喝
翻思在賊愁甘受雜亂聒新歸且慰意生理焉得說至

尊尚蒙塵幾日休練卒仰看天色改旁覺妖氛豁陰風
西北來慘淡隨回紇其王願助順其俗喜馳突送兵五
千人驅馬一萬匹此輩少為貴四方服勇決所用皆鷹
騰破敵過箭疾聖心頗虛佇時議氣欲奪伊洛指掌收
西京不足拔官軍請深入蓄銳伺俱發此舉開青徐旋
瞻畧恒碣昊天積霜露正氣有肅殺禍轉亡胡歲勢成
擒胡月胡命其能久皇綱未宜絕憶昨狼狽初事與古
先別姦臣竟殖醢同惡隨蕩析不聞夏殷衰中自誅褒

妣周漢獲再興宣光果明哲桓桓陳將軍

陳元禮也

仗鉞奮

忠烈微爾人盡非于今國猶活淒涼大同殿寂寞白獸

闈都人望翠華佳氣向金闕園陵固有神掃洒數不闕

煌煌太宗業樹立甚宏達

造次情事却點染悉具朝廷計議途道間闕家室情事無不具備歸家一啟余謂其着色太濃

自京赴奉先縣詠懷五百字

杜陵有布衣老大意轉拙許身一何愚竊比稷與契居
然成濩落白首甘契濶蓋棺事則已此志常覲豁窮年

憂黎元歎息腸內熱取笑同學翁浩歌彌激烈非無江
海志瀟灑送日月生逢堯舜君不忍便永訣當今廊廟
具構厦豈云缺葵藿傾太陽物性固莫奪顧惟螻蟻輩
但自求其穴胡為慕大鯨輒擬偃溟渤以茲悟生理獨
耻事干謁兀兀遂至今忍為塵埃沒終愧巢與由未能
易其節沈飲聊自遣放歌頗愁絕歲暮百草零疾風高
岡裂天衢陰崢嶸客子中夜發霜嚴衣帶斷指直不得
結凌晨過驪山御榻在蟠螭

上徒結切
下音齒

蚩尤塞寒空蹴

踏崖谷滑瑤池氣鬱律羽林相摩莫君臣留歡娛樂動

殷

讀作隱

膠葛賜浴皆長纓與宴非短褐彤庭所分帛本

自寒女出鞭撻其夫家聚斂貢城闕聖人筐篚恩實欲
邦國治臣如忽至理君豈棄此物多士盈朝廷仁者宜
戰慄況聞內金盤盡在衛霍室中堂有神仙煙霧蒙玉
質煖客貂鼠裘悲管逐清瑟勸客駝蹄羹霜橙壓香橘
朱門酒肉臭路有凍死骨榮枯咫尺異惆悵難再述北
轅就涇渭官渡又改轍羣水從西下極目高崒兀疑自

崆峒來恐觸天柱折河梁幸未坼枝撐聲窸窣

上息七切下蘇

骨切行旅相攀援川廣不可越老妻既異縣十口隔風雪

誰能久不顧庶往共饑渴入門聞號咷幼子饑已卒吾
寧捨一哀里巷亦嗚咽所愧為人父無食致天折豈知
秋禾登貧窶有倉卒生常免租稅名不隸征伐撫迹猶
酸辛平人固騷屑默思失業徒因念遠戍卒憂端齊終

南頌

胡孔切

洞不可掇

感時憂國披寫滿懷此老
杜獨到想此言之非虛作

羌村

在鄜州

崢嶸赤雲西日脚下平地柴門烏雀噪歸客千里至妻
孥恠我在驚定還拭淚世亂遭飄蕩生還偶然遂鄰人
滿牆頭感歎亦歔歔夜闌更秉燭相對如夢寐

羣雞正亂叫客至雞鬪爭驅雞上樹木始聞叩柴荆父
老四五人問我久遠行手中各有攜傾榼濁復清苦辭
酒味薄黍地無人耕兵革既未息兒童盡東征請為父
老歌艱難媿深情歌罷仰天歎四座淚縱橫

夜闌更秉燭相對如夢寐豈猶有未招之魂耶
雞正亂叫客至雞鬪爭驅雞上樹木始聞扣柴荆
此非獨村景世亂還家豈惟
妻子驚情即雞犬亦覺異色

唐詩鏡卷二十一